

জাতীয়

সংস্কার কোথায় দাঁড়িয়ে, প্রশ্ন রাজনৈতিক অঙ্গনে

প্রতিবেদক: নিজস্ব প্রতিবেদক

প্রকাশের তারিখ: রোববার, ৩০ আগস্ট ২০২৬, ০৫:২৩ PM



ছবি নিজস্ব প্রতিবেদক

জুলাই-পরবর্তী বাংলাদেশে গণতান্ত্রিক সংস্কার, জবাবদিহি ও অন্তর্ভুক্তিমূলক রাষ্ট্রব্যবস্থা গড়ে তোলার ক্ষেত্রে এখনো নানা বাধা রয়েছে বলে মনে করছেন বিভিন্ন রাজনৈতিক দল, নাগরিক সমাজ ও সংশ্লিষ্ট বিশেষজ্ঞরা। একই সঙ্গে জুলাই জাতীয় সনদের বাস্তবায়ন, রাষ্ট্রীয় প্রতিষ্ঠান সংস্কার এবং রাজনৈতিক সংস্কৃতির পরিবর্তনে দ্রুত কার্যকর পদক্ষেপ নেওয়ার তাগিদ দিয়েছেন তাঁরা।

শনিবার (৮ আগস্ট) রাজধানীর সিরডাপ মিলনায়তনে সেন্টার ফর গভর্ন্যান্স স্টাডিজের (সিজিএস) গবেষণা প্রকল্প ‘রিফর্ম ওয়াচ’-এর উদ্যোগে আয়োজিত ‘সংস্কার কোথায় দাঁড়িয়ে? অগ্রগতি, বাধা ও করণীয়’ শীর্ষক সংলাপে বক্তারা এসব কথা বলেন। অনুষ্ঠানে জুলাই জাতীয় সনদের বাস্তবায়ন অগ্রগতি নিয়ে প্রস্তুত মধ্যবর্তী প্রতিবেদনের ফলাফল উপস্থাপন করা হয়।

সংলাপে বিএনপির সংসদ সদস্য শাহাদাত হোসেন সেলিম বলেন, ৮৪টি বিষয়ের মধ্যে ১৬টিতে ‘নোট অব ডিসেন্ট’ ছিল, তবে সবগুলো

বিএনপির দেওয়া নয়। বিভিন্ন কমিশনের প্রস্তাব এমনভাবে করা হয়েছিল, যাতে বিএনপিকে হাত-পা বেঁধে সাঁতার কাটতে দেওয়া হয়েছে। প্রয়োজনীয় সংস্কার শেষ পর্যন্ত নির্বাচিত সরকারকেই বাস্তবায়ন করতে হবে বলেও মন্তব্য করেন তিনি।

নারীর রাজনৈতিক অংশগ্রহণের প্রসঙ্গে শাহাদাত হোসেন সেলিম বলেন, ঐকমত্য কমিশনে এ বিষয়ে সবচেয়ে বেশি আলোচনা হয়েছে। ৫০টি সংরক্ষিত আসনের পাশাপাশি আরও ৫০টি আসনে সরাসরি নির্বাচনের মাধ্যমে নারীদের অংশগ্রহণের বিষয়েও আলোচনা হয়েছে। তাঁর মতে, বিশেষ কমিটির মাধ্যমে সংবিধান সংশোধন করে সংস্কার বাস্তবায়ন করাই বাস্তবসম্মত পথ।

বিএনপির সংসদ সদস্য জহরত আদিব চৌধুরী বলেন, দুর্নীতি, নারীর প্রতি সহিংসতা, বেকারত্ব ও বৈষম্য বেড়েছে। এসব সমস্যা মোকাবিলায় সরকার ও বিরোধী দলের মধ্যে সংলাপ অব্যাহত রাখা, আমলাতন্ত্রে স্বচ্ছতা ও জবাবদিহি নিশ্চিত করা এবং তরুণদের মধ্যে সহনশীলতা বাড়ানো জরুরি।

জাতীয় পার্টির মহাসচিব ব্যারিস্টার শামীম হায়দার পাটোয়ারী বলেন, রাজনৈতিক স্বার্থের কারণে সংস্কার নিয়ে তৈরি ঐকমত্য দুর্বল হয়েছে। সংসদের বিদ্যমান কমিটিগুলো সব দলের সঙ্গে আলোচনা করে জুলাই সনদের গুরুত্বপূর্ণ বিষয়গুলো বিল আকারে পাস করতে পারে। বিচার বিভাগের স্বাধীনতা, মানবাধিকার কমিশন, বিচারক নিয়োগ, উচ্চকক্ষ গঠন ও পুলিশ সংস্কারে আরও অগ্রগতি প্রয়োজন বলেও তিনি মন্তব্য করেন।

বাসদের রাজেকুজ্জামান রতন বলেন, ক্ষমতার কেন্দ্রীকরণ রোধ, সংসদের কাছে সরকারের জবাবদিহি, নারীর প্রকৃত অংশীদারিত্ব, রাজনৈতিক প্রভাবমুক্ত পুলিশ এবং শক্তিশালী স্থানীয় সরকার নিশ্চিত করতে হবে।

সিজিএসের নির্বাহী পরিচালক পারভেজ করিম আব্বাসী বলেন, জনগণের মতামতকে প্রাধান্য দিয়ে আমলাতন্ত্রের সংস্কার, ক্ষমতার ভারসাম্য ও জবাবদিহি নিশ্চিত করা জরুরি। রাজনৈতিক ঐক্য দুর্বল হলে অপশক্তির ফিরে আসার আশঙ্কা রয়েছে।

সংলাপে জাসদ, এবি পার্টি, সিপিবি, রাষ্ট্র সংস্কার আন্দোলন, খেলাফত মজলিস, এনসিপিসহ বিভিন্ন রাজনৈতিক দলের নেতা, সাংবাদিক, আইনজীবী ও শিক্ষাবিদরা অংশ নেন। বক্তারা অন্তর্ভুক্তিমূলক গণতন্ত্র, নারীর রাজনৈতিক অংশগ্রহণ, স্থানীয় সরকার শক্তিশালীকরণ, জাতিগোষ্ঠীর অধিকার, বিচার বিভাগ ও পুলিশ সংস্কার এবং রাষ্ট্রীয় প্রতিষ্ঠানের জবাবদিহি নিশ্চিত করার ওপর গুরুত্ব দেন।

অনুষ্ঠানটি সঞ্চালনা করেন সিজিএসের সভাপতি জিল্লুর রহমান। তিনি বলেন, সংস্কার একটি চলমান প্রক্রিয়া; গণতান্ত্রিক পুনর্গঠন মূলত ধারাবাহিক চর্চা ও রাজনৈতিক সংস্কৃতির বিষয়।


এ বিভাগের আরও খবর



কর্ণফুলীতে মাইক্রোবাস-কার্ভার্ডভ্যান সংঘর্ষে নিহত ৪
চট্টগ্রামের কর্ণফুলীতে মাইক্রোবাস ও কার্ভার্ডভ্যানের মুখোমুখি সংঘর্ষে চারজন নিহত হয়েছেন। এ ঘটনায় আহত হয়েছেন অন্তত ১১ জন। আহত ব্যক্তিদের মধ্যে...



ফেনীতে প্রধানমন্ত্রীর সফর স্থগিত
প্রধানমন্ত্রী তারেক রহমানের আগামী ১৭ সেপ্টেম্বর ফেনী সফর স্থগিত করা হয়েছে। অক্টোবরের প্রথম সপ্তাহে প্রধানমন্ত্রী ফেনী সফর করবেন বলে জানিয়েছে...



নতুন গ্যাসক্ষেত্র অনুসন্ধানে শেভরনকে বিনিয়োগের আহ্বান প্রধানমন্ত্রীর
দেশের জ্বালানি নিরাপত্তা জোরদার ও ক্রমবর্ধমান চাহিদা মেটাতে যুক্তরাষ্ট্রভিত্তিক আন্তর্জাতিক জ্বালানি কোম্পানি শেভরনকে আরও বেশি বিনিয়োগের আহ...



পাকিস্তানের সঙ্গে ব্যবসা-বাণিজ্য ও শিক্ষা সহযোগিতা বাড়ানোর আহ্বান রাষ্ট্রপতির
পাকিস্তানের সঙ্গে ব্যবসা-বাণিজ্য ও বিনিয়োগ, বিমান যোগাযোগ, দক্ষ ও প্রশিক্ষণসহ পারস্পরিক স্বার্থসংশ্লিষ্ট বিভিন্ন ক্ষেত্রে সহযোগিতা আরও জোর...

